



Ауданның 13 мектебінің оқушыларымен кездесулер өткізілді

Жәңгір хан атындағы Батыс Қазақстан аграрлық-техникалық университетінің профессор-оқытушылар құрамы мектеп түлектеріне болашақ мамандық-тарын таңдауға бағыт-бағдар беру жұмыстарын ұйымдастыруда. Осындай мақсатпен жуырда Қаратөбе ауданында іссапарда болған едік.

Мектеп түлектеріне алдын ала кәсіптік бағдар беру жұмыстарын жүргізудегі басты мақсатымыз – бүгінгі мектеп түлектері алдағы кешенді тестілеуден ойдағыдай өту үшін дағдыландыру жұмыстарын жүргізумен қатар жас талапкерлерге үгіт-насихат жұмыстарын жүргізу арқылы мамандық таңдауға бағыт-бағдар беру. Бұл жұмыстың нәтижесін өткен жылғы деректермен келтіруге болады.

Жалпы Қаратөбе ауданы бойынша мектеп бітіретін түлектер саны, Қазақстанның жоғары оқу орындарына түсетін мемлекеттік білім гранттары иегерлерінің, соның ішінде Жәңгір хан атындағы Батыс Қазақстан аграрлық-техникалық университетіне түскен талапкерлердің, яғни мемлекеттік білім гранттары иегерлерінің жалпы саны артып келеді. Сапар барысында университетіміздің тапсырмасы бойынша аудандық білім бөлімінің басшысы Берік Ғарапшиевпен кездесіп, пікір алмастық. Өзінің білім саласындағы көпжылдық тәжірибесі негізінде осындай жұмысқа ұйытқы болған Берік Ғарапшаұлы егер барлық мектептерде алдын ала кәсіптік

бағдар беру жұмыстары жүргізілсе, оқушылардың білім деңгейін арттыруға, тәжірибе жинақтауға қомақты үлес қосары сөзсіз екенін айтып өтті.

Кәсіптік бағдар беру жұмыстарын жүргізу мақсатында оқытушылар тобынан арнайы команда құрылды. Оның құрамында болған «Ветеринарлық медицина және мал шаруашылығы институтынан» аға оқытушы, ветеринария ғылымдарының кандидаты Ербол Сенгалиев екеуіміз Қаратөбе ауданы бойынша барлығы 13 мектепте алдын ала үгіт-насихат жұмыстарын жүргіздік. Оларға 160-тан астам оқушы қатысты.

Сапарымызға қолдау көрсеткен аудан әкімі Қадыржан Сүйеуғалиев БҚАТУ-да оқып жүрген студенттерді ауыл шаруашылық іс-шараларына, оқу-тәжірибелік машықтану жұмыстарына тартуға, сала мамандарын жұмысқа қабылдауға дайын екендігін ескертті. Білім беру саласындағы ортақ ісімізді жалғастыруға, болашақта біріге жұмыс жасайтынымызға сенім білдірді.

Нарықтық экономика тұсында ауылшаруашылығын тиімді пайдалана отырып, жоғары және сапалы өнімді қамтамасыз ету үшін жан-жақты, білімді, тәжірибесі мол мамандар талап етілуде. Бүгінгі күні Батыс Қазақстан аграрлық-техникалық университеті – батыс аймақтағы ауылшаруашылық және өндірістік, экономикалық салалар үшін жоғары білімді мамандар дайындайтын жалғыз ғылыми орталық. Білім ордасы өзінің 60 жылға жуық



қызметінде республикамызға және шетес елдерге танымал болды. Отандық білімнің, мәдениеттің және ғылымның дамуына үлкен үлес қоса отырып, еліміздің болашағы мен әлеуметтік-экономикасының дамуы үшін мыңдаған мамандар дайындап шығарды.

Ауыл жастарының, мектеп түлектерінің туған жерге деген сезімін ояту үшін төмендегі өлең шумақтарын арнағым келеді:

Елінің ертеңін, болашақ күндерін ойлаған,

Жәңгір ханнан түлеген мамандардай бар ма адам?!

*«Елім» деп ертеңге көз салсаң,
БҚАТУ-дан басталады бар қадам.*

Білімнің нәрімен сусындап,

Ұядан – қияға,

Қырандай қалықтап, ұшады әр маман.

Жастарды заман талабына сай мамандықтарды таңдап, туған елінің әлеуметтік-экономикалық жағдайын көтеруге үлес қосуға шақырамын.

Ғали ОЖАНОВ,

Жәңгір хан атындағы БҚАТУ

доценті, ауылшаруашылық

ғылымдарының кандидаты

Көкейдегі сауалдарды қозғаған шара

Жәңгір хан университетінің №2 студенттік жатақхана-сында «Имандылық – тәрбие мен ізгілік негізі» тақырыбында ашық тәрбие сағаты өтті.



«Өсімдік өнімдерін өндіру технологиясы» жоғары мектебі оқытушылары (Диамара Тулегенова, Лайла Калиева, Әлия Кушенбекова, Айдын Бекқалиева) ұйымдастырған іс-шараға студенттер белсене қатысты. Тәрбие сағатында имандылыққа байланысты бейне-фильмдер көрсетілді.

Имандылық – адамның қоғамдағы, күнделікті өмірдегі іс-әрекеттерін белгілі бір қалыпқа түсіретін ішкі рухани реттеуіш қадір-қасиет, адам бойындағы адамгершілік, ізгілік, кісілік белгісі. «Имандылық» деген бір ғана сөздің бойына ұят, ар, ынсап, қанағат сықылды

бүкіл жақсы қасиеттер түгел сыйып тұр. Имандылық үлкенді сыйлаудан, инабатты болудан басталады. Ар-ұят, ождан – иманның кілті. Осы бағытта өрбіген шарада білім алушылар көкейлерінде жүрген сауалдарға жауап тапты деген ойдамын.

Жастарды имандылыққа тәрбиелеу отбасынан басталады. Сондықтан «Ұяда не көрсе, ұшқанда соны іледі» дейді дана қазағымыз, жастайынан бойға сіңген мінез басқа бір зор күштің әсерінен болмаса, есейгенде де сақталады.

Асылжан ДАНАБАЙ

АН-31 тобының студенті

СТУДЕНТКЕ КЕҢЕС

Есте сақтау қабілетіңізді жақсартыңыз!

Кейде қарапайым нәрселерді қажет кезінде еске түсіре алмай қиналамыз. Кейде, тіпті, таныстарыңыздың есімдерін, телефон нөмірлерін, өлеңдер мен маңызды күндерді жиі ұмытатын жағдайлар кездеседі. Егер осы аталғандар сіздің де басыңыздан өтсе, онда есте сақтау қабілетін жаттықтыратын кез келді. Ол үшін мына кеңестерге құлақ түріңіз.

Тынығу

Ми әр уақытта жұмыс істеп тұрады. Миға салмақ түсірмей жұмыс істеп отырмай дегеннін өзінде де бірнеше минутқа тынығу қажет. Миыңызға ара-тұра жеңіл массаж жасаныз (қабағыңыз бен шашыңыздың орта тұсын саусақтың ұшымен шеңбер жасағандай сәл батырып, укаланыз).

Миды шынықтыру

Ара-тұра мидың жұмысын көбірек іске қосып тұруды да ұмытпаған абзал. Логикалық сұрақтар мен сөзжұмбақтар шешу, ойша санау, өлең жаттау, шет тілдерін меңгеру миды жаттықтыруға септігін тигізеді.

Спортпен айналысу

Спортпен шұғылданатын адамдардың басқаларға карағанда есте сақтау қабілеті жақсы екені дәлелденген. Өсіресе, жүзу мен жүгірудің ми жұмысын жақсартатыны анықталған. Спорт миға келетін қанның көлемін арттырады.

Ұйқы алдындағы ақпарат

Жақсы ұйқы – естесактау қабілеті жойылмауының кепілі. Адам тәулігіне сегіз сағат ұйықтау керек. Ұйқы алдында оқу немесе ақпарат қабылдау – ең тиімді уақыт. Ұйқы барысында ақпарат өңделіп, адамның жадында сақталып қалады.

Тамақтану

Есте сақтау қабілетін арттыратын тамақтар тұтыныңыз. Олардың қатарына – алма, шоколад/какао, балық, балдыркөк (сельдерей), саумалдық (шпинат), қарақат және құлпынай, авокадо, Грек жаңғағы және т.б жатады. Ал таңғы астан бас тарту немесе аз ғана ауқаттану мидың жұмысын нашарлатады. Сонымен қатар темекі өнімдерін тұтыну да жадыңызды жояды.